

Na osnovu čl. 10. i 12. i 76/11 Zakona o udruženjima i fondacijama Bosne i Hercegovine, ("Službeni glasnik BiH", br. 32/01, 42/03 i 63/08), Osnivačka Skupština Udruženja Asocijacije trenera i učitelja skijanja u Bosni i Hercegovini na sjednici održanoj dana 22.04.2012. godine u Sarajevu, donijela je

STATUT

ASOCIJACIJE TRENERA I UČITELJA SKIJANJA U BOSNI I HERCEGOVINI

I OPŠTE ODREDBE

Član 1.

U skladu sa članom 12. Zakona o udruženjima i fondacijama Bosne i Hercegovine (u daljem tekstu: Zakon) ovim statutom propisuje se sljedeće:

- puni i skraćeni naziv, sjedište i adresa Udruženja;
- ciljevi i djelatnosti Udruženja;
- postupak za primanje i isključivanje članova;
- organi udruženja, postupak i način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslovi i način raspuštanja odnosno prestanka rada;
- postupak za izmjene i dopune statuta, ovlaštenja i donošenje drugih opštih akata Udruženja;
- javnost rada;
- pravila za ostvarivanje, korištenje i raspolaganje sredstvima Udruženja, kao i organ koji je ovlašten za nadzor nad korištenjem tih sredstava;
- opis oblika i sadržaja pečata i znaka Udruženja;
- zastupanje Udruženja;
- uslovi i postupak spajanja ili podjele u drugo udruženje i prestanak rada;
- postupak za raspolaganje preostalim imovinom ili drugim sredstvima, u slučaju raspuštanja ili prestanka rada Udruženja;
- podnošenje izvještaja o finansijskom poslovanju i radu Udruženja;
- ostala pitanja u vezi rada i djelovanja udruženja u skladu sa Zakonom i ovim statutom.

Član 2.

Udruženje Asocijacije trenera i učitelja skijanja u Bosni i Hercegovini (u daljem tekstu: Udruženje) je dobrovoljna, nevladina, interesna, nestranačka organizacija osnovana radi ostvarivanja interesa i ciljeva članova Udruženja.

Član 3.

Udruženje stiče svojstvo pravnog lica sa pravima obavezama i odgovornostima danom upisa u registar kod Ministarstva pravde Bosne i Hercegovine.

Član 4.

Udruženje djeluje na cijelom području Bosne i Hercegovine.

II NAZIV, SJEDIŠTE I PODRUČJE DJELOVANJA

Član 5.

Naziv Udruženja je:

Asocijacija trenera i učitelja skijanja u Bosni i Hercegovini,
Asocijacija trenera i učitelja skijanja u Bosni i Hercegovini,
Асоцијација тренера и учитеља скијања у Босни и Херцеговини.

Skraćeni naziv je:

ATUS u BiH,
ATUS u BiH,
АТУС у БиХ.

Član 6.

Sjedište Udruženja je u Sarajevu, ulica Patriotske lige 41.

Član 7.

Udruženje može promijeniti naziv, sjedište i Udruženja, o čemu odluku donosi Skupština Udruženja u skladu sa Zakonom i ovim Statutom.

III CILJEVI I DJELATNOSTI

Član 8.

Ciljevi i djelatnosti Udruženja su:

- udruživanje učitelja skijanja u radi razmjene i prenošenje iskustava kao i unapređenje skijanja u Bosni i Hercegovini,
- usklađivanje i koordiniranje rada sa društvenim, naučnim i stručnim sportskim organizacijama, savezima i školama skijanja u Bosni i Hercegovini radi ostvarivanja zajedničkih interesa i ciljeva,
- organizovanje i sprovođenje kurseva, seminara, edukativnih prezentacija za članove i širu javnost,
- organizovanje redovnih treninga i obuka instruktora skijanja u Bosni i Hercegovini,
- izdavanje knjiga, brošura, letaka i video materijala i drugih publikacija radi ostvarivanja ciljeva Udruženja, a u skladu sa Zakonom.
- razmjena iskustava sa drugim udruženjima i sličnim organizacijama u zemlji i inostranstvu.

Član 9.

Udruženje može obavljati privredne djelatnosti koje su neposredno povezane sa ciljevima Udruženja iz člana 8. ovog statuta (izdavanje knjiga, brošura, letaka i video materijala i drugih publikacija radi ostvarivanja ciljeva Udruženja, a u skladu sa Zakonom).

Udruženje može obavljati nesrodne privredne djelatnosti, (privredne djelatnosti koje koje nisu neposredno povezane sa ostvarivanjem ciljeva Udruženja) samo preko posebno osnovanog pravnog lica u skladu sa Zakonom.

Član 10.

Udruženje može imati svoje kancelarije ili podružnice izvan sjedišta Udruženja na cijeloj teritoriji Bosne i Hercegovine, koje nemaju svojstvo pravnog lica.

Odluku o otvaranju kancelarija ili podružnica donosi Skupština Udruženja nadpolovičnom većinom svih članova.

IV ČLANSTVO U UDRUŽENJU

Član 11.

Osnivači Udruženja su ujedno i članovi Skupštine koji svojstvo člana Udruženja stiču danom upisa u Registar udruženja.

Članom Udruženja mogu postati treni i učitelji skijanja u Bosni i Hercegovini koji prihvate Statut i ciljeve Udruženja.

Članom Udruženja mogu biti i strani državljani koji imaju odobren boravak u Bosni i Hercegovini pod uslovima, ako prihvate Statut i ciljeve Udruženja, i to potvrđuju potpisivanjem pristupnice.

Članom Udruženja mogu postati i pravna lica registrovana u Bosni i Hercegovini, ako prihvate Statut i ciljeve Udruženja, a koja učestvuju u radu Udruženja preko svojih delegiranih predstavnika.

Član 12.

Članovi Udruženja obavezni su plaćati članarinu na osnovu odluke Skupštine Udruženja kojom se utvrđuje visina i način plaćanja članarine.

Član 13.

O prijemu u članstvo odlučuje Skupština.

Članovi Udruženja mogu biti:

- Stalni članovi
- Pridruženi članovi
- Počasni članovi

Član 14.

Stalni članovi Udruženja su lica iz člana 11. ovog statuta, koja su stekla svojstvo člana Udruženja.

Pridruženi član može biti svaka fizička i pravna osoba koja finansijski pomaže Udruženje.

Počasni član može postati fizička i pravna osoba, koja pokaže značajne rezultate u promociji ciljeva i djelatnosti Udruženja.

Za stupanje u članstvo podnosi se pristupnica na propisanom obrascu.

Primljeni član se upisuje u evidenciju članstva.

Udruženje vodi spisak svojih članova.

Prestanak članstva

Član 15.

Članstvo u Udruženju prestaje:

1. Na vlastiti zahtjev, potpisivanjem izjave o istupanju iz Udruženja,
2. Isključenjem u slučaju djelovanja u suprotnosti sa ciljevima i Statutom Udruženja,
3. Smrću člana,
4. Prestankom svojstva pravnog lica.

Član 16.

Svaki član Udruženja može slobodno istupiti iz članstva.

Sa odlukom člana Udruženja o istupanju iz članstva, upoznaje se Predsjednik Udruženja, nakon čega se vrši evidentiranje istupanja.

Član 17.

Isključenje iz članstva se vrši u slučaju kada član Udruženja teže povrijedi odredbe ovog Statuta ili drugih pravila Udruženja ili ako djeluje protivno ciljevima i interesima Udruženja.

Odluku o prestanku svojstva člana udruženja donosi Predsjednik Udruženja.

Lice koje je nezadovoljno odlukom Predsjednika Udruženja, može podnijeti žalbu Skupštini Udruženja u roku od 15 dana od dana prijema odluke.

Skupština razmatra žalbu iz prethodnog stava na prvoj narednoj sjednici i na istoj donosi konačnu odluku.

V PRAVA, DUŽNOSTI I ODGOVORNOSTI ČLANOVA

Član 18.

Prava članova Udruženja su:

1. Da biraju organe Udruženja i da u njih budu birani,
2. Da daju prijedloge, mišljenja i sugestije,
3. Da prate rad Udruženja i pokreću inicijative za rješavanje pitanja od interesa za Udruženje,
4. Da budu redovno informisani o radu i rezultatima rada,
5. Da u zaštiti svojih prava koriste pomoć Udruženja,
6. Da izvršavaju poslove i obaveze povjerene od strane organa Udruženja,
7. Da predstavljaju Udruženje kad im organi Udruženja to povjere.

Član 19.

Dužnosti članova Udruženja su:

1. Da učestvuju u aktivnostima Udruženja,
2. Da savjesno i odgovorno izvršavaju povjerene poslove i zadatke u vezi sa radom i aktivnostima Udruženja,
3. Da propagiraju djelatnost Udruženja, a posebno značaj njenih programskih ciljeva,
4. Da redovno izvršavaju preuzete obaveze prema Udruženju i provode odluke, stavove i zaključke organa Udruženja,
5. Da uredno i na vrijeme izmiruju članarinu u skladu sa odlukom Skupštine Udruženja,;
6. Da se pridržavaju odredaba ovog Statuta,
7. Da informišu organe Udruženja o eventualnom neprimjerenom radu drugih članova Udruženja, a tiču se Udruženja.

Oblici odgovornosti članova će se definisati posebnim Pravilnikom koji donosi predsjednik Udruženja.

VI ORGANI UDRUŽENJA

Član 20.

Organi Udruženja su:

1. Skupština
2. Predsjednik i potpredsjednik Udruženja

1. Skupština

Član 21.

Skupština je organ upravljanja Udruženja, koju čine svi članovi, s jednakim pravom glasa. Radom Skupštine rukovodi Predsjednik Skupštine kojeg bira i razrješava Skupština. Mandat Predsjednika Skupštine traje četiri godine sa mogućnosti reizbora.

Član 22.

Predsjednik Skupštine može biti razrješeno dužnosti prije isteka mandata iz člana 21. stav 3. ovog Statuta i to:

- na sopstveni zahtjev;
- ako pravilno ne obavlja poslove i zadatke Predsjednika Skupštine;
- u drugim slučajevima predviđenim Zakonom i ovim Statutom.

Inicijativu za razrješeno Predsjednika Skupštine može dati 1/3 članova Skupštine.

Član 23.

Skupština Udruženja može biti:

- redovna i
- vanredna

Redovna skupština se sastaje po potrebi, a najmanje jednom u toku kalendarske godine i ima za cilj kontrolu rada putem razmatranja godišnjeg izvještaja o radu Udruženja.

Vanredna skupština saziva se izuzetno, u slučaju nepredviđenih teškoća u radu, poremećaja međuljudskih odnosa u organizaciji ili drugih okolnosti kada je ugrožen rad i vitalni interesi Udruženja.

Način rada Skupštine pobliže se utvrđuje Poslovnikom o radu Skupštine Udruženja.

Član 24.

Skupštinu saziva predsjednik Skupštine najkasnije 15 dana prije njenog održavanja.

Predsjednik Skupštine je dužan sazvati Skupštinu u slučaju kada to zahtjeva najmanje 1/3 članova Skupštine ili kada to zatraži Predsjednik Udruženja.

Član 25.

Radom sjednice Skupštine rukovodi Predsjednik skupštine. Skupština bira zapisničara na početku rada sjednice koji vodi zapisnik. Zapisnik mora da odražava bitan tok rada i suštinu svih odluka i stavova.

Predsjednik Skupštine se:

- stara o organizovanju Skupštine i saziva njene sjednice;
- predlaže dnevni red sjednice;
- predsjedava sjednicama Skupštine;
- potpisuje akte donesene na Skupštini;
- stara se o izvršenju odluka, zaključaka i drugih akata Skupštine;
- vrši i druge poslove koje mu odredi Skupština u skladu sa Zakonom i ovim Statutom.

Član 26.

Skupština radi i odlučuje u skladu sa Statutom i Poslovnikom o radu. Kvorum Skupštine je natpolovična većina svih članova Skupštine Udruženja. Skupština punovažno odlučuje natpolovičnom većinom prisutnih članova Skupštine Udruženja, ukoliko ovim statutom nije drugačije određeno, odnosno da je za određena pitanja potrebna kvalifikovana većina. Glasanje na sjednici je javno, izuzev ukoliko Skupština na samoj sjednici ne utvrdi drugačije.

Član 27.

Skupština u svojoj nadležnosti donosi:

- statut Udruženja, njegove izmjene i dopune i druga opća akta određena Statutom,
- odlučuje o pripajanju ili podjeli u drugo udruženje i prestanku rada Udruženja;
- donosi poslovnik o radu Skupštine;
- bira predsjednika Skupštine i predsjednika i potpredsjednika Udruženja;
- usvaja godišnji program i plan rada Udruženja;
- usvaja izvještaje o radu i finasijski izvještaj koji je pripremio predsjednik Udruženja;
- donosi odluku o visini i načinu plaćanja članarine;
- donosi odluku o ovlaštenim licima za zastupanje Udruženja;
- usvaja završni račun;
- daje autentično tumačenje ovoga Statuta;
- djeluje kao drugostepeno tijelo u žalbenom postupku;
- donosi odluku o prestanku rada Udruženja;
- razmatra i usvaja izvještaje o radu Udruženja, koje podnosi predsjednik Udruženja;
- donosi odluku o obrazovanju komisija i radnih tijela Udruženja;
- donosi odluku o znaku Udruženja,
- odlučuje o proglašenju počasnih članova Udruženja;
- donosi odluku o otvaranju kancelarija - podružnica u skladu sa Zakonom i ovim Statutom;
- donosi odluku o promjeni naziva, sjedišta i znaka Udruženja;
- obavlja druge poslove koji nisu stavljeni u nadležnost drugih organa Udruženja.

2. Predsjednik i potpredsjednik Udruženja

Član 28.

Poslovima i aktivnostima Udruženja upravlja predsjednik i potpredsjednik Udruženja, koje imenuje i razrješava Skupština, u skladu sa ovim statutom. Mandat Predsjednika i potpredsjednika Udruženja je četiri godine sa mogućnošću reizbora.

Član 29.

Predsjednik i potpredsjednik Udruženja je za svoj rad odgovoran Skupštini u skladu sa zakonskim propisima, ovim statutom i drugim aktima Udruženja.

Član 30.

Predsjednik i potpredsjednika Udruženja imaju sljedeća prava, dužnosti i odgovornosti:

- zastupaju Udruženje u pravnom prometu;
- provode politiku i druge odluke koje je donijela Skupština;
- naredbodavci su u izvršenju finansijskog plana;
- vode poslovanje i donose odluke u okviru programa rada i planova razvoja Udruženja;
- određuju izvedbene planove i radne zadatke;
- odgovorni su za zakonitost i poslovanje Udruženja;
- pripremaju i predlažu donošenje svih akata iz nadležnosti Skupštine Udruženja;
- donose opšta akta, izuzev onih koji su u izričitoj nadležnosti Skupštine;
- prate realizaciju finansijskog plana Udruženja;
- izvršavaju odluke Skupštine;
- upravljaju imovinom Udruženja;
- donosi Pravilnik iz člana 19. stav 2. ovog statuta;
- imaju i druga prava i obaveze utvrđene Zakonom, opštim aktima Udruženja, i koje im stavi u nadležnost Skupština Udruženja.

Član 31.

Predsjednik i potpredsjednik Udruženja mogu biti razriješeni dužnosti prije isteka vremena na koje su imenovani i to:

- na sopstveni zahtjev;
- ako pravilno ne obavljaju poslove i zadatke Predsjednika i potpredsjednika Udruženja;
- u drugim slučajevima predviđenim Zakonom i ovim Statutom.

Inicijativu za razrješenje Predsjednika i potpredsjednika Udruženja može dati 1/3 članova Skupštine.

Predsjednik i potpredsjednik Udruženja su ovlašteni da donose odluke po svim pitanjima koja se odnose na tekuću aktivnost Udruženja, izuzev pitanja koja spadaju u isključivu nadležnost Skupštine.

VII KOMISIJE I RADNA TIJELA

Član 32.

Radi svestranog razmatranja i odlučivanja o pojedinim pitanjima iz djelokruga djelatnosti Udruženja, Skupština Udruženja može obrazovati stalne ili povremene komisije.

Sastav i djelokrug komisije se utvrđuje odlukom Skupštine Udruženja.

VIII PRIHODI I IMOVINA

Član 33.

Prihodi Udruženja su:

- članarine;
- dobrovoljni priloz i pokloni fizičkih i pravnih lica, kako stranih, tako i domaćih u gotovini, uslugama ili imovini bilo koje vrste;
- prihodi od kamata, dividendi, dobiti od kapitala, zakupnina, honorara i sličnih izvora pasivnih prihoda;
- prihodi stečen kroz ostvarivanje ciljeva i aktivnosti Udruženja;
- iz drugih zakonom dozvoljenih izvora.

Član 34.

Ostvarivanje, korištenje i raspolaganje sredstvima Udruženje utvrđuje se finansijskim planom kojeg donosi Skupština na prijedlog Predsjednika i potpredsjednika Udruženja.

O korištenju sredstava, u skladu sa finansijskim planom odlučuje Predsjednik i potpredsjednik Udruženja.

Član 35.

Nadzor nad korištenjem sredstava vrši Skupština Udruženja.

Skupština je nadležna za kontrolu svih dokumenata, koji se odnose na finansijsko poslovanje, posebno periodičnih, polugodišnjih i završnih finansijskih izvještaja.

Dokumenta iz prethodnog stava Skupština razmatra na redovnoj godišnjoj, a ako je potrebno i vanrednoj sjednici Skupštine te iste podnosi nadležnim organima u skladu sa Zakonom i drugim propisima i ovim Statutom.

IX OBLIK SADRŽAJA PEČATA, ŠTEMBILJA I ZNAKA UDRUŽENJA

Član 36.

Pečat Udruženja je okruglog oblika, promjera 3,5 cm sa upisanim nazivom Udruženja latiničnim i ćirilčnim pismom: Asocijacija trenera i učitelja skijanja u Bosni i Hercegovini / Асоцијација тренера и учитеља скијања у Босни и Херцеговини i sjedište Sarajevo / Сарајево i znakom Udruženja u sredini pečata. Udruženje može imati više pečata, s tim što svaki mora biti numerisan brojevima. O čuvanju i upotrebi pečata stara se predsjednik i potpredsjednik Udruženja.

Član 37.

Udruženje može imati štambilj, koji je pravougaonog oblika, dimenzija 50x25 mm i sadrži puni naziv Udruženja Asocijacija trenera i učitelja skijanja u Bosni i Hercegovini / Асоцијација тренера и учитеља скијања у Босни и Херцеговини i sjedište Sarajevo / Сарајево, kao i prostor za upisivanje broja predmeta i datum zavođenja akta u djelovodni protokol.

Član 38.

Udruženje ima svoj znak. Znak Udruženja je okruglog oblika, oivičen sa dvije kružnice od kojih je jedna tanka svijetlo plave boje, a druga deblja tamno plave boje, u sredini se nalazi slika skijaša. U kružnici tamno plave boje u gornjem dijelu piše: Asocijacija trenera i učitelja skijanja u Bosni i Hercegovini, velikim štampanim slovima.

X ZASTUPANJE UDRUŽENJA

Član 39.

Udruženje zastupaju u pravnom prometu Predsjednik i potpredsjednik Udruženja, u okviru ovlaštenja utvrđenim ovim statutom i Zakonom.

Član 40.

U postupcima u kojima Udruženje sudjeluje kao stranka radi ostvarivanja svojih prava, dužnosti i odgovornosti pred nadležnim organima, Predsjednik Udruženja može dati pismenu punomoć advokatu za zastupanje ili drugoj stručnoj osobi.

XI JAVNOST RADA

Član 41.

Rad Udruženja je javan. Javnost rada ostvaruje se neposrednim informisanjem i putem sredstava javnog informisanja za značajnije aktivnosti. Svim članovima omogućit će se uvid u obavljanje aktivnosti na svim područjima na kojima djeluje ovo Udruženje, kao i planiranje daljnjih aktivnosti.

Član 42.

Članovi Udruženja moraju biti redovno informisani o radu Udruženja. Za javnost rada odgovoran je Predsjednik Udruženja.

XII POSTUPAK ZA IZMJENU I DOPUNU STATUTA

Član 43.

Skupština je nadležna za donošenje Statuta, izmjene i dopune Statuta i drugih općih akata određenih Statutom.

Izmjene i dopune Statuta Udruženja usvaja Skupština, konkonzusom ukupnog broja članova.

Inicijativu za izmjene i dopune Statuta može podnijeti 2/3 članova Udruženja.

Inicijativa se upućuje Predsjedniku Udruženja koji priprema tekst nacрта za izmjene i dopune Statuta.

Član 44.

Udruženje može pored Statuta imati i druga opća akta.

Organi Udruženja donose opće akte Udruženja: pravilnike, poslovnike i odluke koji moraju biti u saglasnosti sa Zakonom i ovim Statutom.

XIII PRIPAJANJE ILI PODJELA U DRUGO UDRUŽENJE

Član 45.

Udruženje se može spojiti ili podijeliti u drugo Udruženje u skladu sa Zakonom.

Odluku iz prethodnog stava donosi Skupština dvotrećinskom većinom svih članova Skupštine Udruženja.

XIV NAČIN OSTVARIVANJA FINANSIJSKOG IZVJEŠTAJA I IZVJEŠTAJA O RADU

Član 46.

Skupština, na redovnoj godišnjoj sjednici usvaja Finansijski izvještaj i Izvještaj o radu Udruženja, za prethodnu godinu.

Udruženje je dužno da uredno vodi poslovne knjige u skladu sa opšte prihvaćenim računovodstvenim principima i da sastavlja finansijske izvještaje u skladu sa relevantnim zakonima.

Član 47.

U sjedištu Udruženja, u rokovima utvrđenim zakonom ili odlukama Skupštine ili Upravnog odbora, obavezno se čuvaju sljedeći dokumenti: Statut društva; godišnji i polugodišnji obračun poslovanja Udruženja, sa bilasnom uspjeha; zapisnici i odluke Skupštine, Upravnog odbora i predsjednika Udruženja; akti tekuće korespondencije i drugi akti vezani za rad i poslovanje Udruženja.

Član 48.

Udruženje može prestati sa radom dobrovoljno na osnovu odluke Skupštine ili po sili zakona.

Inicijativu za prestanak rada Udruženja može dati 1/3 članova Udruženja, u slučaju:

- ako je proteklo dvostruko više vremena od vremena za održavanje Skupštine utvrđenog ovim statutom, a Skupština Udruženja nije održana,
- da se broj članova Udruženja smanji ispod broja tri.

Odluku o dobrovoljno prestanku rada donosi Skupština udruženja dvotrećinskom većinom svih članova Skupštine Udruženja.

Istovremeno Skupština donosi plan likvidacije Udruženja, kojim se utvrđuje raspored imovine, prava i obaveze Udruženja u skladu sa Zakonom i ovim statutom, s tim što je prethodno obavezno izmiriti zakonske i ugovorne obaveze.

Preostala imovina, nakon podmirenja obaveza iz prethodnog stava, će se dodijeliti drugom udruženju, koje obavlja istu ili sličnu statutarnu djelatnost, a na osnovu odluke Skupštine Udruženja.

Član 49.

Udruženje prestaje sa radom po sili Zakona u skladu sa članom 50. i 51. Zakona.

XV ZAVRŠNE ODREDBE

Član 50.

Tumačenje odredbi ovog Statuta daje Skupština Udruženja.

Član 51.

Ovaj Statut stupa na snagu danom donošenja, a primjenjivaće se od dana upisa u Registar udruženja kod nadležnog ministarstva.

PREDSJEDNIK OSNIVAČKE SKUPŠTINE:

Broj: 01/12

Siniša Kovač

Sarajevo, 20.06.2012. godine